

## **I N F O R M A C I J A**

### **o poduzetim aktivnostima u procesu imenovanja novog saziva Komisije za registraciju oznaka porijekla, oznaka geografskog porijekla i dodjelu oznaka garantirano tradicionalnog specijaliteta prehrambenih proizvoda u Bosni i Hercegovini**

Ovom informacijom, Agencija za sigurnost hrane Bosne i Hercegovine (u daljnjem tekstu: Agencija) upoznaje Vijeće ministara Bosne i Hercegovine o poduzetim aktivnostima u procesu imenovanja novog saziva Komisije za registraciju oznaka porijekla, oznaka geografskog porijekla i dodjelu oznaka garantirano tradicionalnog specijaliteta prehrambenih proizvoda u Bosni i Hercegovini, o značaju funkcioniranja i značaju kontinuitetu rada navedenog tijela.

U skladu sa odredbama Pravilnika o sistemima kvaliteta za prehrambene proizvode („Službeni glasnik BiH“, broj 90/18), na prijedlog Agencije u saradnji s nadležnim organima entiteta i Brčko distrikta Bosne i Hercegovine, Vijeće ministara Bosne i Hercegovine imenuje Komisiju za registraciju oznaka porijekla, oznaka geografskog porijekla i dodjelu oznaka garantirano tradicionalnog specijaliteta prehrambenih proizvoda u Bosni i Hercegovini (u daljem tekstu: Komisija). Vijeće ministara Bosne i Hercegovine imenovalo je važeći saziv Komisije Odlukom o imenovanju Komisije za registraciju oznaka porijekla, oznaka geografskog porijekla i dodjelu oznaka garantirano tradicionalnog specijaliteta prehrambenih proizvoda u Bosni i Hercegovini („Službeni glasnik BiH“, broj 84/19). Komisiju čine predstavnik Agencije koji je ujedno i predsjednik Komisije, kao i predstavnici Ministarstva vanjske trgovine i ekonomskih odnosa Bosne i Hercegovine, Federalnog ministarstva poljoprivrede, vodoprivrede i šumarstva, Ministarstva poljoprivrede, šumarstva i vodoprivrede Republike Srpske, Federalnog ministarstva trgovine, Ministarstva trgovine i turizma Republike Srpske Vlade Brčko distrikta Bosne i Hercegovine Odjel za poljoprivredu, vodoprivredu i šumarstvo.

Pravilnik o sistemima kvaliteta za prehrambene proizvode („Službeni glasnik BiH“, broj 90/18) usaglašen je sa EU zakonodavstvom, a postupak za registraciju oznake porijekla i oznake geografskog porijekla, kao i postupak dodjele oznake garantirano tradicionalnog specijaliteta prehrambenih proizvoda u Bosni i Hercegovini propisan je na isti način kao i u zemljama Evropske unije.

Donošenjem navedenog Pravilnika i imenovanjem Komisije stvoreni su uslovi za zaštitu naših prehrambenih proizvoda kako na nacionalnom, tako i na nivou Evropske unije. Postupak za registraciju oznake porijekla i oznake geografskog porijekla, kao i postupak dodjele oznake garantirano tradicionalnog specijaliteta prehrambenih proizvoda u Bosni i Hercegovini provodi Komisija, a rješenja o registraciji donosi Agencija.

U skladu sa odredbama Pravilnika o sistemima kvaliteta za prehrambene proizvode („Službeni glasnik BiH“, broj 90/18), na osnovu provedenog postupka za registraciju i prijedloga Komisije, Agencija donosi rješenje o registraciji oznake porijekla, oznake geografskog porijekla, odnosno rješenje o upisu u registar garantirano tradicionalnih specijaliteta prehrambenih proizvoda.

Do sada je u Bosni i Hercegovini registrirano ukupno sedam prehrambenih proizvoda, od čega tri zaštićenom oznakom geografskog porijekla, dva zaštićenom oznakom porijekla i dva oznakom

garantirano tradicionalnog specijaliteta. Rješenja o registraciji objavljuju se u Službenom glasniku BiH i na službenoj web stranici Agencije.

Podnosioci zahtjeva za registraciju zaštićenih oznaka Agenciji trebaju dostaviti sljedeću dokumentaciju: popunjen obrazac zahtjeva za registraciju naziva prehrambenog proizvoda zaštićenom oznakom porijekla ili zaštićenom oznakom geografskog porijekla, odnosno popunjen obrazac zahtjeva za garantirano tradicionalni specijalitet; kopiju dokaza za registraciju grupe; izjavu nadležnog tijela grupe o usvojenoj odluci o zaštiti oznake porijekla, oznake geografskog porijekla, odnosno garantirano tradicionalnog specijaliteta; punomoć (ako grupu zastupa ovlašteni zastupnik, ili opunomoćenik) ovjerenu kod notara; specifikaciju proizvoda; popunjen obrazac Jedinstvenog dokumenta za oznaku porijekla i oznaku geografskog porijekla; potvrdu tijela za ocjenjivanje usaglašenosti da se može izvršiti certifikacija i naziv i adresu grupe koja podnosi zahtjev i tijela, ako je dostupna, koja provjeravaju usklađenost s odredbama specifikacije.

U skladu s Odlukom o imenovanju Komisije za registraciju oznaka porijekla, oznaka geografskog porijekla i dodjelu oznaka garantirano tradicionalnog specijaliteta prehrambenih proizvoda u Bosni i Hercegovini („Službeni glasnik BiH“, broj 84/19), Komisija je imenovana na period od četiri godine i isti ističe u mjesecu decembru tekuće godine. Uzimajući u obzir istek mandata, Agencija će uputiti dopise nadležnim organima da predlože svoje predstavnike za članove Komisije. U skladu s propisanom procedurom, nakon prijema imenovanja predstavnika nadležnih organa Agencija će sačiniti novu Odluku o imenovanju Komisije i istu će dostaviti Vijeću ministara Bosne i Hercegovine na razmatranje i usvajanje.

Kontinuitet procesa registracije zaštićenih oznaka je značajan budući da se prilično veliki broj prehrambenih proizvoda nalazi u završnoj fazi za pokretanje postupka zaštite, što ukazuje na činjenicu da sami proizvođači sve više postaju svjesni značaja zaštite svojih proizvoda.

Polazeći od naprijed navedenog, predlaže se Vijeću ministara Bosne i Hercegovine, da nakon razmatranja ove Informacije donese sljedeći:

### **Zaključak**

*Usvaja se Informacija o poduzetim aktivnostima u procesu imenovanja novog saziva Komisije za registraciju oznaka porijekla, oznaka geografskog porijekla i dodjelu oznaka garantirano tradicionalnog specijaliteta prehrambenih proizvoda u Bosni i Hercegovini.*

U skladu sa Pravilima za konsultacije u izradi pravnih propisa („Službeni glasnik BiH“ broj: 5/17), daje se:

## **IZJAVA O SVRSI DONOŠENJA**

### **INFORMACIJE O PODUZETIM AKTIVNOSTIMA U PROCESU IMENOVANJA NOVOG SAZIVA KOMISIJE ZA REGISTRACIJU OZNAKA PORIJEKLA, OZNAKA GEOGRAFSKOG PORIJEKLA I DODJELU OZNAKA GARANTIRANO TRADICIONALNOG SPECIJALITETA PREHRAMBENIH PROIZVODA U BOSNI I HERCEGOVINI**

U skladu s Odlukom o imenovanju Komisije za registraciju oznaka porijekla, oznaka geografskog porijekla i dodjelu oznaka garantirano tradicionalnog specijaliteta prehrambenih proizvoda u Bosni i Hercegovini („Službeni glasnik BiH“, broj 84/19), Komisija je imenovana na period od četiri godine i isti ističe u mjesecu decembru tekuće godine.

Očuvanje kontinuiteta procesa registracije zaštićenih oznaka je značajano budući da se prilično veliki broj prehrambenih proizvoda nalazi u završnoj fazi za pokretanje postupka zaštite, što ukazuje na činjenicu da sami proizvođači sve više postaju svjesni značaja zaštite svojih proizvoda.